

Cosmographie Vniuerselle

*Fleuve de
Maragnon.*

*Gouffe de
Tafel.*

*Gouffe de
Ben Zide
Cap de
Vele.*

*Gouffe d'Er-
rabe.
Erreur de
Martin Fer-
ran.*

grand fleuve de Maragnon, l'emboucheure duquel i'estime estre la plus large qui soit en l'vniuers, il gist sur les trois cens trente trois degrez trente cinq minutes de longitude, deux degrez quarante cinq minutes de latitude. A cinquante six lieues de ce fleuve, se trouue la riuere de Vincent Pinçon, aussi nommee du nom de celuy qui premier la descourrit: & de là vint mouiller l'anchre, en celle dite Salee, esloignees l'une de l'autre de vingt six lieues ou environ, & en mesme esleuation: comme est aussi la riuere Douce: encores qu'elle soit distante de la Salee de plus de sept vingts lieues. De là prenez la route de Ponteau, qui gist à trois cens vingt & deux degrez trente quatre minutes de longitude, huit degrez trente minutes de latitude, deçà l'Equator. Et en cest endroit commencent les Isles Cameranes, qui fleeschissent au Nord, quart de Nordest: Et costoiant tousiours à gauche, voyez le Goulfe de Parias, l'un des beaux de la terre du Peru: gisant a trois cens vingt & un degrez de longitude, huit degrez de latitude. Au deuant duquel s'en voit vn autre qui n'a telle largeur. Il laisse le Cap de Salines, & le Goulfe de Cariace, distants l'un de l'autre de cinquante lieues ou environ: d'autant qu'ils tirent de la part d'Occident, & qu'ils ont esté peu frequentez des nostres. La riuere de Caniane n'est moindre en largeur que les susdites, laquelle est distante du haure de Tafe de douze lieues, & de celuy de Core de octante sept lieues: & gist à trois cens dix huit degrez vingt neuf minutes de longitude, neuf degrez dix minutes de latitude. A six lieues de ce haure se trouue le cap de saint Romain, gisant a trois cens dix degrez quarante minutes de longitude, dix degrez trente minutes de latitude. Je ne veux oublier à vous dire que depuis le Goulfe Cariace susdit, iusques icy sont opposees à la coste plusieurs belles & grandes Isles, entre autres celles de la Marguerite, la Blanche Tortugues, Boraque, Arcille, Roque, des Oyseaux, Biuare, Curacoe, & Arube, avec autres Illetes les vnes habitees, & les autres non. Et quelques soixante lieues en pleine mer, de la part du Nord, sont celles de saint Jean, sainte Croix, & autres de la suite des Cameranes. Costoiant tousiours la terre, vous venez au Goulfe de Benezuele, l'entree duquel gist à trois cens dix degrez trente minutes de longitude, & dix degrez de latitude: Et de là au cap de Vele, distant de celuy de saint Romain quelques quarante trois lieues ou environ: & est posé sur les trois cens huit degrez trente minutes de longitude, douze degrez de latitude. Et à vingt cinq lieues d'iceluy, est la riuere de la Hasse, en mesme esleuation que le Cap susdit: comme aussi est celuy de Laguna & de sainte Marthe. Passant outre & a quelques quinze lieues de là, si est question vous allez mouiller l'anchre, en vne riuere nommee Grande, d'autant qu'elle est navigable plus de trente lieues auant en terre: à l'entree de laquelle se presentent bon nombre d'Isles, & isleaux fort plaisantes à cause qu'elles verdoyent en tous temps: & est a trois cens cinq degrez trente minutes de longitude, & vnze degrez de latitude. Le cap de Cartagene: portant le nom d'une ville qui est en Espagne, & celuy de Cemy où sont les Salines du pays, gisent sur les trois cens trois degrez quarante minutes de longitude, huit degrez trente minutes de latitude: & est distant ledit cap de Cemy de ladite riuere de quelques vingt cinq lieues. Je serois bien marry d'oublier l'un des grâs Gouffes qui soit parauenture, en ceste terre, & d'un Pole à l'autre, que lon nomme Vrabé: non pas que ie vueille maintenir l'erreur du Pilote Martin Ferrant, qui luy donne trois cens deux lieues de long en terre: car ie scay bien qu'il n'en a non plus, que ie vous ay dit ailleurs: l'entree duquel est sur les trois cens vnze degrez quarante cinq minutes de longitude, & huit degrez quinze minutes de latitude. Toute la coste depuis ledit cap de Vele iusques à ce Goulfe a deuant soy vne infi-